

alles vnglück/ Als. i. Johannis. 5. geschuiben
steet. Vnser glaub ist der syg der die welt vber-
wunden hat. Der gleichen sagt auch Christus
Johannis am. 16. Seyt getröst/ ich habe die
welt vberwunden/ Als wölt er sagen/ Nicht
allain mir/ sonder euch zu gut/ ist die welt vber-
wunden. Dañ weyl Christus vberwundē hat/
so können auch die an in glauben/ ja die durch
den glauben in Christo sind/ vberwinden die
welt/ mit all irer bitterkait vñ trübsal/ die sich
zufüget den gotesfürchtigen. Der glaub hanget
am wort götlicher zusage. Die hoffnung aber
harret vñ wartet auff die hilff vñ erlösung/
welche das götlich wort zusagt. Disen glaub
ben vñ solche hoffnung muß dir Got geben
durch seine geyst/ du kanst sie nicht haben auß
dir selbs/ oder auß deiner vernunfft vñ krafft
Darumb spricht sant Paulus zum Römern. 8.
Das der geyst Gottes vnser schwachait auff
hilfft/ wo er nicht hiffet/ da kan der mensch im
leyden nicht besteen. Vñ zum Römern am. 5.
Wir rümen vns auch der trübsalen/ die weyl
wir wissen/ das trübsal gedult bringet. Die ge-
dult aber bringet erfahrung. Die erfahrung aber
bringet hoffnung. Die hoffnung aber lasset
nicht zu schanden werden/ das alles darumb/
das die liebe gottes ist außgossen in vnser hertz